

UVODNA RIJEČ

EDITORIAL

Cijenjene kolege i kolegice,

kao predsjednik *Saveza udruženja građana geodetske struke u Bosni i Hercegovini* osjećam se posebno počašćenim što sam u prilici da vam se u ovom broju časopisa *Geodetski glasnik* prvi obratim. Želim napomenuti da je prije pet decenija (davne 1967. godine) iz štampe izašao prvi broj našeg časopisa *Geodetski glasnik*.

U vašim rukama je *Geodetski glasnik* broj 47, jedini naučni časopis iz domena geodetske struke na prostoru Bosne i Hercegovine. Posebno treba istaći da većina autora članaka u ovom broju dolazi izvan granica Bosne i Hercegovine. Autori su svoje radove poslali na engleskom jeziku, a uredništvo časopisa na čelu sa glavnom i odgovornom urednicom doc. dr. sc. Medžidom Mulić odlučilo je radove objaviti na jeziku na kome su i napisani. Ovom prilikom se zahvaljujem cijenjenim recenzentima koji su pažljivo i detaljno pregledali članke, uradili recenzije i predložili kategorizaciju članaka. Sav ovaj trud je uložen kako bi vi dragi čitaoci, i naravno naša domovina Bosna i Hercegovina, imali pred sobom naučni časopis iz oblasti geodetske struke u Bosni i Hercegovini na visokom nivou. Obzirom da smo u međuvremenu uvršteni u još referentnih naučnih baza podataka, nadam se da će naš i vaš *Geodetski glasnik* biti na nivou najuglednijih časopisa iz domena geodezije i srodnih nauka. Također sam veoma ponosan obzirom da nam stižu pohvale od mnogobrojnih kolega iz inostranstva.

Tekuća 2016. godina je za časopis *Geodetski glasnik* jubilarna, jer je to godina u kojoj se navršava punih 50 godina izlaženja časopisa. Nažalost, moram konstatovati da su teške okolnosti (prije svega finansijske) uzrokovale nedostatak tri broja našeg časopisa, tako da je u pedesetoj godini izlaženja izdat *Geodetski glasnik* broj 47. Veseli me činjenica da je *Federalno ministarstvo obrazovanja i nauke* prepoznalo kvalitet i ulogu časopisa *Geodetski glasnik* u bosanskohercegovačkom društvu, pa je ove jubilarne godine finansiralo štampanje časopisa. Koristim priliku da se zahvalim zaposlenicima ***Federalnog ministarstva obrazovanja i nauke*** na čelu sa ministricom dr.sc. Elvirom Dilberović.

Želim napomenuti da je 2016. godina proglašena Međunarodnom godinom karata i tim povodom je *Savez udruženja građana geodetske struke u Bosni i Hercegovini* organizovao javno predavanje na kojem je predavač bio akademik, prof.dr.sc. Mithad Kozličić, redovni profesor Sveučilišta u Zadru.

Mnogo je problema različitih vrsta i različite prirode pri izdavanju časopisa *Geodetski glasnik*, ali je isto tako veliki entuzijazam ljudi koji naporno rade kako bi i ovaj broj časopisa bio dostupan u Bosni i Hercegovini i šire. Želim se zahvaliti svima koji su na bilo koji način pomogli izlaženje ovog broja časopisa. Posebno se želim zahvaliti, u svoje ime i u ime Saveza, kompanijama ***GeoWild d.o.o. Sarajevo, Geodet d.o.o. Sarajevo, Zedis d.o.o. Zenica i AMG d.o.o. Visoko*** na finansijskoj pomoći.

Na kraju ovog kratkog uvodnog obraćanja preostaje mi da Vam poželim ugodne trenutke uz *Geodetski glasnik* broj 47 i da vas pozovem na saradnju pri izdavanju narednih brojeva časopisa.

*Predsjednik Saveza udruženja građana
geodetske struke u Bosni i Hercegovini
Admir Mulahusić*